

摘藻堂四庫全書薈要

集部

欽定四庫全書薈要

集部
御選元詩卷十一

詳校官原任主事臣李斯咏

欽定四庫全書薈要卷一萬八千四百二十三

集部

御選元詩卷十一

樂府歌行十

郭鈺

控郎馬酬別蕭茂才

控郎馬妾心悲留郎住郎苦辭少年只願封侯早不惜
蛾眉鏡中老銀鞍金勒珊瑚鞭白水青山千里道控郎
馬郎駐鞍郎飲莫須盡酒醒郎衣寒郎心懸懸五雲下

教妾若為控郎馬馬蹄好向御街行蛾眉不向妝臺畫

子夜歌

子夜歌罷其如明月何牽牛織女遠相望不教精衛
填銀河妾心本如秋月白妾顏不共春風發玉兔搗藥
三千年近見嫦娥搔白髮

子夜歌承君蛺蝶雙花羅羅衣秋來不堪著梧桐樹上
涼風多銀燭作花好消息又想歸期在明日并刀不剪
相思愁相思誤盡曾相識

秋塘曲

高荷擁翠秋滿塘
花開不見聞花香
老魚吹波紫萍碎
花下飛起雙鴛鴦
鴛鴦相逐低回翔
藕絲易斷愁心長
玉箏不彈轆轤悄
一簪華髮凝秋霜

送遠曲

為君治行近一月
今晨竟作忽忽別
枕邊紈扇鏡中花
一時盡變傷心色
妾雖不見邊城秋
君亦不識空閨愁
憶君便如君憶妾
雙淚豈為他人流
才貌如君長刺促

少年心事何時足歸期未定須寄書誤人莫誤燈花卜

春暮吟

玉壺酤酒青絲絡啼鳥勸人滿盃酌落紅滿地暗香消
濕翠如煙午陰薄畫樓玲瓏隔彩霞樓前雙鵲鳴喳喳
想見吳帆北風起王孫明日當還家

春夜吟

月色如水花如雲美人樓上歌迴文棲鴉飛起玉階樹
香風吹動殷紅裙去年寄書到君側書中只寫思君切

情知人老髮如絲君歸不恨緣君白插花記月夜未央
他人苦短我嫌長若使驅車到家日天涯芳草愁茫茫

四時詞

煖雲飛撲玉驄歸簾捲香風酒力微夜坐久憐明月好
細鋪花影繡羅衣

日射嫣紅安石榴波涵空翠木蘭舟美人調笑渡江去
半榻柳風碁不收

鶴認琪花欲下遲蓬萊仙客遣催詩情深寫到相思處

秋露芙蓉開滿池

疎林晴旭散啼鴉
高閣珠簾窄地遮
為問王孫歸也未
玉梅開到北枝花

妾薄命

孤鷺窺鏡翦情緣
淚血沾襟十五年
誰信舊時歌舞伴
相逢猶自如嬋娟

劉永之

白苧詞

象牀玉瑱鴛鴦裊銅盤畫燭燒紅雲芳樽蘭勺霑朱脣
白紵高歌動梁塵請君試聽曲意新揮金縱歡及良辰
落葉辭條無再春遺令高臺作歌舞鬱鬱西陵那得聞
連枝蜀錦鋪金堂中山旨酒實瓊觴豹胎猩脣出中房
博山火紅夜未央催弦促柱歌吹揚輕身向君回玉璫
妖姿艷態世無雙君心胡為樂遠行

行路難

涉水多蛟龍跋山多猛虎荒城荆棘上參天大澤修蛇

橫草莽百里黥慘無人煙驅車值行陷泥滓前車軸折
後車來行人不覺旁人哀眼前道路已如此何況太行
高崔嵬為君歌路難請君試一聽位高金多豈足貴擊
鐘鼎食何足榮東溝水流西溝涸昨日花開今日落世
事榮枯反覆手七尺之軀安所託古來賢達人與時同
卷舒龐公鹿門隱馬生鄉曲居款段聊乘下澤車何用
終朝出畏途

四時歌

錄一首

學士峰頭雁正過將軍峽口柳無多雲屏露冷衣裳薄
欲擢觥船采芰荷

盛或

和春愁曲

鶯黃柳枝撲輕雨裊斷新愁千萬縷菱花倦拂瑣窗間
吹得瑤笙雜鶯語下牀不受春風扶傷春擊碎青珊瑚
香消玉散繡針澀閒開五色雙鸞離恨難禁情未愜
那肯將心託紅葉翠帷深護曲闌花羞殺東家白蝴蝶

耙鹽詞

朝耙灘上泥暮煮釜中雪妾身煮鹽不辭苦恐郎耙泥
筋力竭君不見東家阿嬌紅粉媚不識把鋤巧梳髻昨
日典金釵愁殺官鹽價高貴

丁鶴年

采蓮曲

采蓮復采蓮仍唱采蓮曲若欲知苦心須食蓮中肉采
蓮復采蓮踟躕一何久不愁花妬容惟恐刺傷手采蓮

復采蓮藕亦不可棄中有不斷絲似妾纏絲意采蓮復
采蓮爭如采荷好花謝葉獨存團圓以終老采蓮復采
蓮湖水清且深徒能照妾面不能照妾心采蓮復采蓮
下有孤鴛鴦秋花不結實夜夜守空房蓮開花覆水蓮
謝藕在泥不學青萍葉隨波東復西朝采並蒂蓮暮綰
同心結不學楊柳枝含顰送離別蓮舟何處來同住西
湖口郎憐波上花妾愛泥中藕藕有青白節花有豔冶
容郎心異妾心三歎掩歸篷

竹枝詞

竹雞啼處一聲聲
山雨來時郎欲行
蜀天恰似離人眼
十日都無一日晴

水上摘蓮青的的
泥中采藕白纖纖
却笑同根不同味
蓮心清苦藕芽甜

吳惟善

小遊仙

河漢無聲海月寒
長鯨吸浪洞庭乾
一聲鐵笛風雲動

人在危樓第幾闌

趙訪

黃星行

八月十五夜未央中天皓月懸清光大星稀少小星沒
出門四顧山蒼蒼我生不讀甘石書但見一星明且黃
今宵不見兒童怪應隨斗柄西山外石橋徙倚聞幽香
荷葉團團大如蓋黃星明夜應復來清露為酒荷為杯
舉杯漫與黃星壽自古昆明有劫灰

謝應芳

西湖曲

西湖春水綠於酒
西湖女兒嬌似柳
依稀二月三月春
攀折千人萬人手
我有一索青銅錢
明朝也買下湖船
試歌斷臂孤兒曲
湖上豈無人解傳

嚴將軍戰馬歌

并序

至正乙未春常多盜
省府調兵捕之
浙東宣慰司
元帥嚴公來總軍事
未幾無錫平
移軍武進一日

擣禾富莊賊巢軍中失二馬明日賊乘之抗官兵
烈塘上二馬聞金鼓來奔賊控勒不能止遂墮地
馬立踉殺之官兵大捷故余烈塘之民咸神其事
俾余作歌以美之

往聞齊軍夜路迷老馬前導人追隨又聞的盧躍檀溪
漢業復立西南陲古來良驥稱有德未有驍騰能殺賊
將軍兩馬馱賊來雲霧四起生風雷紅綃帕首爾何物
霜蹄一踏成飛埃軍前認主鳴且舞驚倒熊羆與驅虎

羣兇膽落敵前追官軍凱還搥大鼓馬兮馬兮誠有功
須知感物由元戎將軍接迹武惠功煌煌史冊書勲庸
爾馬名示垂無窮

古鼎歌

并序

中喜萬壽寺舊藏古銅鼎其竅識有云王在周康
穆宮冊錫寰用作皇考鄭伯姬尊鼎大德中任陽
謝氏嘗欲以重寶易之時住持點翁師不從後謝
氏為構佛殿點遂以鼎答之至正丙申謝遭兵鼎

因失去甲辰夏四月愚隱智公乃得於軍人之手
者舊聚觀皆曰吾山中舊物也既而出鼎見示且
徵余詩以紀之

碧雲師著金伽黎空王殿上龍象隨一夫長跣送古鼎
狀若獻寶波斯兒羣緇來觀集丈室中有老夫曾致詞
云是山中舊時物立誦款識能無遺惟有臣裒紀君賜
用顯厥考鄭伯姬文詞詰屈錯盤詰字體隱伏蟠蛟螭
蒼姬訖錄世屢改不知何代來於斯謝家寶樹易趙璧

巨構賈與秦城齊鼎兮鼎兮什襲去歲逾數紀今來歸
師聞此語重歎息兵火連年炎九域金鐘大鑪棄路傍
總若沈沙銷折戟珠連合浦獨無恙護持信有天龍力
摩挲兩鉉濕煙霧錯落丹砂映金碧濁水摩尼五色兼
出海珊瑚高一尺嗚呼羲軒之鼎真可求禹鼎亦已淪
東周世所用者非爾儔或膨豕腹徒包羞調羹爾無與
覆餗爾不憂歸來兮歸來北山兮菟裘汾陰自有為時
出切莫放光驚斗牛

踏車婦

吳田水深三尺許猶是去年秋暮雨勸農使者催春耕
田甲頻搗水車鼓江村破屋能幾家家婦姑俱踏車
蓬飛兩鬢赤雙脚亦有兒女雙髻了淞江太湖愁滿眼
白汗霑衣足生繭車輪鹿鹿羊角轉水波翻翻龍舌卷
春來十日九日晴不聞鶉鳩呼雨聲牛毛微颺土未濕
辛苦又加三日程當家豈無夫與子打魚糴米去城市
城中禁米難出關田上忍飢還戽水四郊未種圍田穀

三邊催運官倉粟

沈貞

樂神曲 并序

樂神曲者擬楚詞九歌而作也吳人尚鬼祀必以巫覡迎送舞歌登獻其詞褻慢禳災邀福不知其分滋黷甚矣故為此詞以明鬼神之理禱祀之意祛其荒淫之志焉

保我之民兮邑此方崇其牖兮浚其隍民不驚兮志定

眷靈修兮作民命隄楊兮結陰青青兮蔽林女牆堅兮
有郭有郭繞洄灣兮濠歸於壑靈之來兮元都颺旂旌
兮若茶陳一豕兮兩踰載斟之兮百壺城兮隍兮吾永
無虞

右城隍

嗟靈伯兮御清泠洗祥歎兮滌炎蒸駘蕩兮春初颺颺
兮夏徂颼颼下兮木葉枯號空桑兮吹雪載塗靈之來
兮憑女巫巫女巫兮屢舞箬簫兮伐鼓靈醉飽兮無怒蕭

蕭來兮颺颺去

右風伯

佩芳蘭兮擘芬椒潔新服兮綴珠珖駕靈螭兮翔重霄
要靈輅兮下迢迢我禾兮成役我田兮龜坼烈日兮驕
陽利行水兮熱湯靈之徠兮天外下土乾兮霑一溉維
靈布澤兮惠我無私嗟我民兮其敢斃思靈皇皇兮萃
只舞傲傲以醉止福襍襍兮

右雨師

月維仲兮日維剛肅齋宮兮神所藏靈輝輝兮垂佩儼
飛馭兮高蓋降靈雨兮來斯左有翁兮右有妃悵嘉期
兮難又羌永歎兮陳詞靈修修兮不語逝翩翩兮歸去

右社公

波震蕩兮具區既底定兮奠神之居芙蓉蓋兮凌車導翠
龜兮文魚神之來兮孰俱後子皮兮前靈胥與神游兮
湖之滸衝風息兮極浦有倡兮妙舞有列兮清醑神飽
聿歸兮或返而顧灌我田兮受神之祐

右太湖神

雄何為兮厲於鄉祀有時兮享有嘗楮白馬兮青蓋明
而無兮晦而在屏方相兮去讎神巫進兮舞且歌雄欣
欣兮遠逝不水旱兮不疵厲樂吾民兮世世

右鄉厲

兩旗兮分張舞輕風兮悠揚神之司兮我疆原田每每
兮立我青秧不稂不莠兮無疔無妨時雨兮時暘俾百
穀兮登場維神兮降康報之兮肴蒸脂羊

右青苗神

張庸

賣驢買牛歌

驢可以跨不可耕牛可以耕還可跨山人賣驢歸買牛
買得牛來頗同價溪雨初收水繞門山人曉耕溪上雲
土膏不覺秋成早香秫釀成新酒渾翻思養驢竟何益
空將芻豆飽其食軀小蹄薄終無力有時跳梁蹶側石
草深牛背穩於舟浩歌白石南山秋却笑哦詩灞橋上

滿身風雪歸來休

行路難書所見

昨朝殺虎潘家園今朝殺虎蘆浦團獵人羽箭銅牙弩
連朝殺虎來送官送官歸去日將夕沙路紛紛皆虎跡
四山哮吼刮腥風手驚弩墮那能射君不見一虎死百
虎生行路難路難行

郭文

竹枝詞

金馬何曾半步行碧雞那解五更鳴儂家夫壻久離別
恰似兩山空得名

金信

洞庭曲

浩蕩太湖水東西兩洞庭吹簫明月裏龍女坐來聽
湖上望蘇臺水與青天遠長風送飛帆忽到長洲苑

馬臻

湖中春遊曲

堂堂復堂堂畫鷁誰家郎繡旌駕頸冷膳府驚刀光傾
椒注桂邀流芳楚膏絡索聞懸璫篋篋急響如相惱岼
頭折盡忘憂草黃金慣積自媒身隨肩滿席惟嗔老牙
籤萬軸齒不黏孟容何賓迹如埽柳絲撲撲乘風吹花
翎小鳥啼訴誰玉郎沈醉晚未醒春光去矣猶不知

鷓鴣篇

鷓鴣鷓鴣不知春色何負汝每到春來聲更苦百年不
得此身安尚憶當時在行旅爾不學大鵬一舉培風兩

翼如雲垂又不學籬邊斥鷃翱翔飛躍蓬蒿枝黃陵廟
前幾春草空遺怨恨傳新詩江南二月煙花亂子子孫
孫自呼喚說盡人間行路難淒風苦雨心腸斷

雙鶴吟寄友人

依依兩白鶴歲久住青田一鶴垂兩翅飲啄沙汀煙一
鶴展長翮冥冥自冲天思之不可見獨立秋風前有時
月夜羣動息孤唳一聲山水碧凝眸側頸復裊回影落
空林風露濕故人獨抱經濟才淵珠炯炯光難埋江南

地暖梅花開折花待君君不來
梅花歲歲開又落空向
梅邊詠雙鶴

前結交行

古交山上松青青色不改縱有霜雪侵節操固常在今
交陌上花容貌相矜誇一朝風雨至飄泊隨泥沙陳雷
管鮑世不有一貧一富難長久對面相看仰泰山下視
羣峰皆培塿嗟來乎嗟來乎牀頭黃金不可無君看金
盡失顏色壯士灰心不丈夫

後結交行

古交皆結心其意能斷金今交皆結金倏忽能變心取
舍既殊軌反掌生陸沈正平一朝忤黃祖有若將身投
猛虎子桑莫逆忘其生乃能相與無相與古人今人皆
足悲百年憂樂須臾期男兒節義死不變誰肯心懷未
濟時嗚呼誰肯心懷未濟時

烏夜啼

烏夜啼朝啼啼東方白
夜啼林影黑關河萬里天
雨霜月

冷夜長眠不得烏夜啼
憐爾巢中黃口時
哺腥吞腐羽
毛長母子日日長
追隨一旦離羣自成偶
相呼相喚期
相守故雄零落不復知
留得孤雌住
衰柳柳條蕭颯難
棲身夢驚三月楊花春
載飛載止情莫伸
欲去不去愁
殺人不知挾彈誰家子
暴物傷生苦如此
哀音散入江湖間
老屋破窗燈欲死
烏夜啼君豈知

嗟餘春

春雨足春水滿
岼花匝光風暖
人間杜宇最知機
啼

得血流春不管迷芳著物苦忘歸直待楊花似雪飛多
少好懷成別恨餘香沁入野薔薇

查居廣

孝子行

并序

豐城廖孝子至元十九年鄉寇大作子負母冒刃
逃反靖孝養終身與江革不殊惜無史書之揭翰
林近題其墓曰有元純孝廖某之墓又為作文刻
石虞學士書之

豐城昔在至元歲寇賊紛紛亂如鬼是時廖生抱母行
不死白刃天有情固知至願天必感母子全活見太平
廖生雖死猶未死往往遺民言此事有如江革遭亂離
負母潛逃經險阻情詞惻惻賊舍之孝德還堪耀今古
嗚呼薄俗獯獯同墓上請看純孝子

李道坦

山中苦寒歌

深山苦寒弗可居門前積雪三尺餘陰崖一夜石蛻骨

寒溜萬瓦冰垂鬚道人凍餓山之麓暮熱松明煮溪綠
山陰孤棹期不來夢入幽巖聞折竹征西將軍持短兵
馳馬夜渡黃河冰關東諸將面欲裂嚴光獨釣桐江雪

春日行

東風入樹吹流鶯曉窗隔霧花冥冥美人窗間動曉思
鶯聲枕上啼春晴塵中日出花滿城城南春深楊柳青
王孫不歸消息斷深閨無人春草生草生猶有時王孫
何日歸斜陽照流水萬里長相思東園三月花爛開西

鄰蝴蝶雙飛來明朝
蝶去春無主閉門
花落愁如雨

張雨

奔月卮歌荅鐵崖所作

甕社明珠奔入月
脫殼政似風蟬潔
漁網出之不敢視
滌盡含沙光不滅
文昌四星吞在腹
一金晶大如粟
蜃物還來作飲器
日夜雄雌繞林屋
一扇桃核寬有餘
半葉蕉心卷未舒
飲非其人躍入水
怪雨盲風生坐隅
置之天上白玉盤
斗柄挹酒長闌干
李白跳下鯨魚背

持勸我飲相交歡幽宮馮夷為子泣酌盡海水百怪出
還我平生老蚌胎許君醉卧鮫人室

玉笙謠為鐵門笙伶周竒賦

我有紫霞想愛聞白玉笙懸匏比竹無靈氣昆丘採此
十二莖鳳唳銜明珠鳳翼排素翎金華周郎妙宮徵子
晉仙人初教成月下吹參差羣雛亦和鳴緱氏山頭白
雲起七月七日來相迎長謝時人一揮手飄下滿空鸞

鶴聲

效隱居擬古樂府寒夜愁

夜寒生羣獸驚寂兮寥兮棲遁情陰宮漫漫落葉平岡
頭霜月弄微明寒漏澀寒絃繁愁腸結愁語盡人生異
木石思來誰能忍

湖州竹枝詞

臨湖門外吳儂家郎若閒時來喫茶黃土築牆茅蓋屋
門前一樹紫荆花

桂枝詞

桂樹叢生枝婀娜
糝粟黃雲欲成朵
薰醒秋衣嬾下牀
金蟾嚙斷燒香鎖

古意

吳綾光纒纒
織成鯨掉尾
美人不敢裁
恐觸波浪起

明德游仙詞十首用天柱山傳來依韻繼作深
於道氣者觀之亦足自拔於埃壒矣

錄六首

白玉之盤滄海東
蒼蒼下視遠如空
請看端正山河影
不滿均堂杯中

夜久扶桑海色分
珠宮望拜赤龍君
洞庭未省君山在
元是崑崙一朵雲

右股清池足漚麻
池中肥水是松花
早知魏帝一丸藥
肯信東門五色瓜

恥作深山服食仙
伐毛洗髓故依然
木蘭墜露研朱寫
只寫南華秋水篇

脚底琴生三尺鯉
袖中阿母一雙桃
別時身動凌波鞞
爛月如銀照夜濤

玉格金科自有期赤城何待遠尋師壁梭也解為龍去
樵斧如何只看棋

富恕

西湖竹枝詞

十里荷花錦一機雨餘荷氣撲人衣滿船游女蒙白苧
陣陣腥風鷗鷺飛

于立

漁莊欸乃歌

笑容千樹齊臨水
橘柚滿林都是霜
飲罷玉人歸別院
只留明月照漁莊

對酒清歌窈窕娘
持杯勸客手生香
袖中藏得雙頭橘
一半青青一半黃

烏夜啼送朱長元赴膠州同知

城頭烏夜啼
還過上林棲上林
高樹多好枝
歸飛啞啞
東復西起看江月
沈江底使君遠遊中
夜起軟紅陌上
踏青陽快馬猶龍車
似水烏夜啼啼送君
驅車出門風

欲薰東方日出如車輪

道英

對山曲

青山作賓翁作主
山翁持觴山鶴舞
山翁對山傾綠醕
青山對翁默無語
山本無情翁無心
青山不飲翁自斟
酒闌對山撫掌笑
山鶴一聲山月沈

秋夜曲

西風不起凝空碧
霜花霏霏炯秋色
層霄輾上玉一輪

竹影參差光欲滴洞房深寂湘簟寒夢回孤枕疎漏傳
雁聲低度吳天遠素壁青燈瑤穗斷隔雲聽徹五更鐘
鴛鴦屏冷初日紅

希陵

送人歸山中歌

青山兮欲歸不可得兮褰衣駕元豹兮驂赤狸雲冥冥
兮風飛獨偃蹇兮世路寧容與兮溪湄泉涓涓兮石齒
齒君不歸兮何為

秋夜長

秋蟲嘖嘖寒莎底城頭秋月白如水二十五點秋夜長
點點滴斷離人腸萬里一身風露涼家家秋砧搗衣忙

明本

田歌

邨南村北春水鳴村村布穀催春耕手捧飯盃向天祝
明日插秧還我晴

與恭

天台石橋歌

五百人兮山之中驅白虎兮騎蒼龍袈裟兮襪縷頭髮
兮蓬鬆神怪萬狀兮吾不得而窮望歸來兮庭之幃燒
香淪茗兮鐘鼓交搥不見來兮勞思坐蒸餅子淚垂汝
將舍我兮而何之

行端

思洞庭寄承天寺覺菴老師

煙蒼蒼濤茫茫洞庭遙遙天一方上有七十二朶之青

芙蓉下有三萬六千頃之白銀漿中有美人兮佩服金
鴛鴦游龍車鳴月璫直與造化參翱翔憶昔天風吹我
登其堂飲我以金莖八月之沆瀣食我以崑丘五色之
琳琅換爾精髓滌爾肝腸灑然心地常清涼非獨可以
眇四極輕八荒抑且可以老萬古凋三光久不見兮空
慨慷久不見兮空慨慷

清琪

山居吟

滿山筍蕨滿園茶一樹紅花間白花大抵四時春最好
就中尤好是山家

茅屋低低三兩間團團環繞盡青山竹林不許閒雲宿
日未斜時便掩關

山形凹凸路高低石占雲頭屋占蹊地窄栽來蔬菜少
又營小圃在橋西

移家深入亂峰西煙樹重重隔遠溪年老心閒貪睡穩
厭聞鐘響與雞啼

半窗斜日冷生光
破衲蒙頭坐竹牀
枯葉滿爐燒焰火
不知屋上有寒霜

深秋時節雨霏霏
蘚葉層層印虎蹄
一夜西風吹不住
曉來黃葉與階齊

老來無事干懷抱
竹榻高眠石枕斜
夢裏不知誰是我
覺來新月到梅花

獨坐窮心寂杳冥
个中無法可當情
西風吹盡擁門葉
留得空階與月明

覺恩

甘菊歎

手栽甘菊巖之阿，一十一莖為一窠。
當暑不灌亦不摘，自然生意成婆娑。
頗怪秋來風雨橫，枝條滿地根鬚迸。
青蟲食葉還食心，小草閒花出頭上。
林間一夜清霜飛，蟲死草枯惟菊枝。
黃金錯莫看愈好，三嗅馨香徒自悲。

元鼎

方寸鐵歌贈伯盛朱隱君

人心何危患多岐方寸之鐵貴自持百鍊耿耿明秋暉
彼柔繞指何詭隨朱盛剛勁真吳兒法書鐵畫逼秦斯
晴窗握管儼若思學成變法出愈竒鐵耕代筆猶神錐
用之切玉如切泥孤忠不媿月食詩清便更賦楊花詞
元祐黨碑我所非驢鳴犬吠我所嗤雕蟲小技同兒嬉
屠龍妙割嗟奚為盛乎盛乎知不知南北車書滾滾來
中興定勒磨崖碑大書深刻非子誰

文信

和西湖竹枝詞

湖西日脚欲沒山湖東月出牙梳彎
南北兩峰船上看恰似阿儂雙髻鬟

湖上采菱菱濕衣泥中取藕藕得歸
怪殺鴛鴦不獨宿却嫌鷓鴣傍人飛

感金麒麟雙髻了白銀作甲彈琵琶
何曾辛苦事蠶織水口紅船長是家

東邊高樓紅紫開西邊青山翠成堆
吳兒蕩槳浪花裏

相賽唱歌船去來

照

和西湖竹枝詞

日日采蓮湖水濱
湖中白日照青春
東風吹雨過湖去
江花愁殺未歸人

趙珍

漁莊欸乃歌

繡戶芸窗八面開
漁莊酒色淨如苔
鯉魚三尺丹砂尾

聽得清歌出水來

雨後芙蓉霜後楓
漁莊只在畫橋東
不知前面花多少
映水殘霞爛漫紅

壽寧

洞雲操

火流空兮折荆枝
塵漲天兮箠不可支
依我洞兮綠下垂
絙我綠綺兮操青霞
以為辭華山兮希夷
吾與汝兮來歸

椿

和西湖竹枝詞

放船早出裏湖邊
阿儂唱歌郎蹋船
唱得望湖太平曲
共郎長樂太平年

良震

和西湖竹枝詞

六月七月生晚涼
大樹小樹臨幽窗
枯槎行蟻過無數
晴空好鳥飛一雙

淨圭

游仙詞

霞光閃閃五雲東
樓觀巍巍照碧空
忽報夜池催賜宴
翠鸞飛景月明中

縹緲仙山五色雲
玉真飛佩度氤氳
不應名字題仙籍
猶看唐家舊賜裙

洞草巖花處處春
壺中日月鏡中身
飈輪飛度麟洲水
知是仙班第一人

松飄金粉落空庭石上清齋玩易經應笑世人工肉食
滿頭垂白采參苓

塵寰擾擾事如麻恨我東風易落花阿母蟠桃才一熟
人間幾度摘秋瓜

瓊樓十二亞相連樓上仙姝笑粲然青鳥忽煩將遠意
紫霞新寫寄來篇

青童小隊鼓琅璈仙子酣歌詠碧桃下視人寰方洵洵
紅塵如海漲波濤

青鳥銜書降玉京
芙蓉金掌露華清
深宮無限情緣在
不是神仙不易成

宗衍

野雞毛羽好

野雞毛羽好不如家雞能報曉
新人美如花不如舊人能績麻
績麻作衫郎得著郎見花開又花落

惟則

篳篥引 并序

西瑛懶雲窩距余禪室半里許時相過從吹篳篥
以為供復於余言有所需乃賦長歌以贈

西瑛為我吹篳篥發我十年夢相憶錢塘月夜鳳凰山
曾聽酸齋吹鐵笛初吹一曲江風生餘響入樹秋嗚咽
再吹一曲江湖驚愁雲忽低霜月黑坐中聽者六七人
半是江湖未歸客歡者狂歌繞樹行悲者垂頭淚沾膝
我時奪却酸齋笛斂襟共坐松根石脫略悲歡萬念消
悟聲無性聞無跡西瑛篳篥且莫吹篳篥從古稱悲栗

悲歡茫茫塞天地人情所感無今昔山僧尚賴雙耳頑
請為西瑛吐胸臆聲聞相觸妄情生聞盡聲亡情自釋
盡聞莫謂聞無聲機動籟鳴無間隔亡聲莫謂聲無聞
去來歷歷明喧寂吹者之妙余莫知聞者之悟公莫測
公歸宴坐嬾雲窩心空自有真消息

善學

山趣吟

我趣山幽逸山幽豈易言但容來老衲未許過高軒泉

眼山邊活鳥聲花外喧紅塵無路入風景似桃源

山宇吟

菴鎖雲巒樹鎖煙淡濃蒼翠筆難傳石邊添箇頭陀坐
一幅丹青世外懸

山雲水石道人家方寸常開不夜花風味與人真箇異
夜深撥火自烹茶

掃石跏趺默坐間春深幽鳥亂啼山白雲愛我菴前住
與我常年共放閒

大圭

和詹生春雨寒歌

十日春九日雨空屋貯寒寒色苦曉雪都成陌上泥暮
雲不見城東樹所思今何處相去纔幾許獨將寸心寄
短琴琴老無絃暗塵土東風吹落錦一幅文章字字成
金玉中有苦寒詞詞古聲更悲賡歌我不忍上訴蒼蒼
知俗眼瞳人久生脂競收瑣尾遺瑰竒野禽乘軒士徒
步黃土被繡人無衣天公有意回春燠千林一夜生紅

綠長年呻吟卧掩門人生不解同草木君勿歌春雨寒
我有兩耳愁心百盤爐空葉已灰屋漏苔生椽檐聲夜
夜春水懸人間惟我與子同此味鬢髮未白書如山春
雨寒歌一闋窮達在天愁不得當時短衣夜半悲飯牛
何如學取商頌聲金石

魏國夫人管氏

漁父詞

南望吳興路四千幾時回去雲溪邊名與利付之天笑

把漁竿上畫船

身在燕山近帝居
歸心日夜憶東吳
斟美酒膾新魚
消却清閒總不如

人生貴極是王侯
浮利浮名不自由
爭得似一扁舟
弄月吟風歸去休

鄭氏允端

吳人嫁女詞

種花莫種官路傍
嫁女莫嫁諸侯王
種花官路人取將

嫁女王侯不久長
花落色衰情變更
離鷺破鏡終分張
不如嫁與田舍郎
白首相看不下堂

擬寄衣曲

男兒遠向交河道
鐵馬金戈事征討
邊頭八月霜風寒
欲寄戎衣須趁早
急杵清砧擣夜深
玉纖銅斗熨貼平
裁縫製就衣襖裙
千針萬線始得成
封裏重重寄邊使
為語夫君奮忠義
好將功業立邊陲
要使聲名垂史記

余季女

遣興歌

妾誰怨兮薄命一氣所神兮化生若甌春山媚兮秋水
淨秉貞潔兮妾之性聊歌兮遣興

夜夢兮食梨命靈氛兮與予占之曰行道兮遲遲斂角
枕兮粲如風動惟兮心悲

雲黯黯兮雪飛棘夫子介兮如石苦復留兮不得望平
原兮太息涕泗橫兮沾臆

送子去兮春樹青望子來兮秋樹零樹有枝兮枝有英

我胡為兮煢煢子在此兮山城

織女兮牛郎星回紀兮為參商欲徑渡兮河無梁霜露
侵襲兮病偃在牀嗟嗟夫子兮誰與縫裳

士女曹妙清

西湖竹枝詞

美人絕似董嬌嬈家住南山第一橋不肯隨人過湖去
月明夜夜自吹簫

士女張妙靜

西湖竹枝詞

憶把明珠買妾時
妾起梳頭郎畫眉
郎今何處妾獨在
怕見花開雙蝶飛

薛氏蘭英蕙英

蘇臺竹枝詞

姑蘇臺上月團團
姑蘇臺下水潺潺
月落西邊有時出
水流東去幾時還

館娃宮中麋鹿遊
西施去泛五湖舟
香魂玉骨歸何處

不及真孃葬虎丘

虎丘山上塔層層靜夜分明見佛燈約伴燒香寺中去
自將釵釧施山僧

門泊東吳萬里船烏啼月落水如煙寒山寺裏鐘聲早
漁水江風惱客眠

洞庭餘柑三寸黃笠澤銀魚一尺長東南佳味人知少
玉食無由進上方

荻芽抽筍棟花開不見河豚石首來早起腥風滿城市

郎從海口販鮮回

楊柳青青楊柳黃
青黃變色過年光
妾似柳絲易憔悴
郎如柳絮太顛狂

翡翠雙飛不待呼
鴛鴦並宿幾曾孤
生憎寶帶橋頭水
半入吳江半太湖

一縞鳳髻綠如雲
八字牙梳白似銀
斜倚朱門翹首立
往來多少斷腸人

百尺高樓倚碧天
闌干曲曲畫屏連
儂家自有蘇臺曲

不去西湖唱采蓮

徐氏女

途中怨

萬水千山去路賒
青鞵踏破幾層沙
登山絕頂重逢嶺
渡水尤深又復涯
雁字只傳夫與子
魚書難寄母和爺
回頭遙望鄉關處
雲下峰前是我家

鄭奎妻

春詞

春風吹花落紅雪楊柳陰濃啼百舌東家蝴蝶西家飛
前歲櫻桃今歲結鞦韆蹴罷鬢髮粉汗凝香沁綠紗
侍女亦知心內事銀瓶汲水煮新茶

夏詞

芭蕉葉展青鸞尾萱草花含金鳳嘴一雙乳燕出雕梁
數點新荷浮綠水困人天氣日長時針線慵拈午漏遲
起向石榴陰畔立戲將梅子打鶯兒

秋詞

鐵馬聲喧風力緊雪窗夢破鴛鴦枕玉爐燒麝有餘香
羅扇撲螢無定影洞簫一曲是誰家河漢西流月半斜
要染纖纖紅指甲金盤夜搗鳳仙花

冬詞

山茶花開梅半吐風動簾旌雪花舞金盤冒冷望狡猥
繡幙圍春護鸚鵡倩人呵筆畫雙眉脂水凝寒上臉遲
妝罷扶頭重照鏡鳳釵斜壓瑞香枝

張氏

寄外兄弟二首

山之高兮月出小月之小兮何皎皎
我有所思在遠道
一日不見兮我心悄悄

采苦采苦于山之南
忡忡憂心其何以堪

無名氏

和楊鐵崖西湖竹枝詞

蘇公堤上楊柳青
人來人去管離情
東風為爾丁寧道
折斷柔條莫再生

天竺寺前開翠微
長年流水白雲飛
流水入湖無日歇
白雲出岫有時歸

櫻桃詞

江南四月春歸早
紅紫千枝迹如掃
枝頭新綴纓絡珠
一樹櫻桃爛晴昊
菱花照見白家娘
一顆胭脂相鬪好
青樓遠客迷芳草
三食櫻桃送春老
鳳凰在何方銜將
飛遠道

雪花曲

苦篁獵獵吹北風黃河水流凝不通天孫手持白鸞尾
笑埽琪花飛碧空崑山玉碎瓊樓裂老龍起舞驚明月
夢覺游魂不覺寒醉吟紙帳春雲熱東家嬌娘厭桃李
學繡宮花瑣窗裏冷袖擎來欲細觀隔簾火氣催成水

劉妙容

伊州曲

月既明西軒琴復清寸心斗酒爭芳夜千秋萬歲同此
情歌宛轉宛轉聲已哀願為星與漢光景共徘徊悲且

傷參差淚成行
低紅掩翠方無色
金徽玉軫為誰鏘
歌宛轉宛轉結復悲
願為煙與霧氤氳共容姿

御選元詩卷十一

謹案第十四頁後六行鷓鴣篇按馬臻霞外集本
作二禽篇分鷓鴣杜鵑二首此僅錄鷓鴣一首
第十八頁後五行一一金晶大如粟按張雨句曲
外史集粟作菽今仍刊本





總校官庶吉士臣侍朝

校對官檢討臣蕭九成

臆錄監生臣周元

欽定四庫全書薈要

集部

御選元詩卷十二

詳校官原任主事_臣李斯咏

欽定四庫全書薈要卷一萬八千四百二十四 集部

御選元詩卷十二

五言古詩一

耶律楚材

過濟源和香山居士韻

覃懷勝遊地濟瀆垂名久忽見樂天吟笑我輸先手麗
詞金玉振老筆風雷走乘興試續貂啓我談天口平湖
湧泉注清涼瑩無垢憑檻瞰漣漪風髯塵抖擻龍孫十



萬竿翳翳濃陰厚沁水濟源東天壇王屋右秀色已可
餐何須杜康酒步步總堪詩佳篇如素有賡酬淡相對
獨有龍岡叟亭上幾徘徊斜陽西入酉晚年歸意切對
此空沈首何日遂初心營居碧林後

郝經

雁媒

雲衢眇飛鴻往來解隨陽序當夜有所次進朝有行瀚
海天山西卯育歲為常八月秋風高雖雖共南翔水國

足汀洲江湖多稻梁
晝帶殘蘆老岫青草長
哀鳴洞庭月亂點
瀟湘霜太和開冰天
北去頑穹蒼信禽法
天運斷不為炎涼
偶為篝燈誤縛足
離江鄉飲啄養為
媒朋儔總相忘
嗷嗷解愁人乃反
無愁腸弋人見冥
鴻矰繳潛施張
置媒使號呼投網
來搶攘奄忽一舉
盡羽毛皆摧戕
厭然束縛去又向
雲間望嗟嗟罔民
徒詭計不可防
被獲反為用竭力
如鬼蜮有信復無
智終自為身殃
誤已更誤人不悟
真可傷

遊靈巖寺

并序

乙卯秋九月十九日登泰山二十二日下太平頂

遂遊靈巖寺

岱宗西北馳倒卷碧玉環嶽靈祕雄麗勢欲藏三山初
從谷口入兩崦爭孱顏漸疑下地底細路深屈盤仰視
覺天窄石井攢峰巒陸海沙劫開突兀仁王壇桐鯨吼
西風棟宇橫高寒石龍噴清泉灑落几案間脩竹埽山
色瑩綠穿雲根丹鳳飢不來寂莫青琅玕上方在天上

下視無塵寰空霏鎖霜樹翠錦蒙朱殷西日回清輝輕
金滿煙鬟何時脫世網挂席高盤桓靜境求初心滯慮
驅萬端向晚蒼煙合更欲窮躋攀路斷不得前矯首重
一看

贈青社諸公

北風吹海氛雄鯨偃修鱗皇皇擇木鳥落日將安之清
霜摧豐林枯沙沒卑枝况復天地閉豈汝飛騰時嗷嗷
復嗷嗷途窮愈多歧寸心增鬱陶拊髀潛生悲蒼茫欲

問津謾使行人嗤賴有魯連子亦在東海湄舉手謝浮
世共欲尋安期扶搖三山巔笑傲雲濤低半夜開扶桑
弄日騰清輝伊昔孔尼父亦欲居九夷世網儻可逃去
去夫何疑

渡江書所見

并序

己未秋奉命宣撫江淮自鄧南入新野蹈宋北鄙
渡泌河及湖陽入於春陵陂塘聯絡眈澮縈屬邨
墟翳翳荒空不可行佳木脩竹竒花異卉櫛比林

莽間怵然有感於中而取野蓮荒竹秋桐野菊四
者姑以寓感焉

野蓮

陂塘渺煙蕪秋波淡浮空蕪葭雜芙蓉依稀見愁紅輕
鎖露華涼亭亭倚西風金粉亦自香霞腴為誰容無言
恨最深失偶情更濃搖搖似相招為喜詩人逢翻思彼
桃李反在羅綺中復憶巖下蘭綠葉翳荒叢西子出苧
蘿原思老蒿蓬萬物在生處莫謾仇天公

荒竹

荒竹遶廢宅高下隨
女蘿新梢入林莽
迸葉揚條柯玉骨
清且癯埋沒還奄
阿病綠煙慘悽枯
黃雨滂沱劍斷戟
復折壯士空悲歌
伊昔主家安森森
氣相摩穉龍起雲
雷平地煙霄過幽
香澹庭除靜陰延
綺羅一自兵塵生
人去斤斧多寂寞
秋不實飢鳳將奈
何

秋桐

高秋江漢波卉木
入搖落荒林擁孤
桐蔓草重繞縛淒

迷氣日喪憔悴若墮籜黃彫晚風吹青裂飢鳥啄無時
亦無儔幢幢老陰薄儀鳳安所棲宮樹空寂寞謂汝無
自傷植根亦嬌弱豈能持風寒况乃失所託何時此焉
居揚鋤翦荒惡攜幼板庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野
迴幽姿清岡斷寒豔接絲蟲冒青苞啼螿抱枯葉灑露
積玉華層層擁金屑我欲摘以杯飲之濯中熱霜栽郁

高標胡與荒穢列嗟爾夷惠儔玉質難變滅不謂無人
看便使幽香歇安得老瓦盆坐對澆古月

橄欖

南人謂
之格覽

南果足韻勝北人罕為奇銀盤獻青子愛玩驚見之蓮
房飽出螭棗滑生下枝翠粉苔埽新清烈凝松脂齒牙
噴艱澀苦硬不可持氣韻久始來靈根淪天池灑然凌
清飈甘露濡仙芝有如宿瘤妻苦節真可期亦如相韓
休朕瘠天下肥危辭遽逆耳終自為良規先難阻欲速

後得卒莫違默默心語口此樂夫誰知始覺衆果俗橋
奴復黎兒海嶺瘴天黑異味翻茶飴雨露存天真颯霧
不可滋島嶼出乳泉造化亦若茲元氣舌本甜酸苦歸
涕洟本來甘受和衆味相假移居然復其源偽妄焉能
欺何當謝世網兀坐忘奔追深山石室空煮石療調饑
破鼎煎春芽嚼此吟湘纍翛然沃肺肝看山坐支頤物
表有真味載歌采薇詩

秋思四首 錄二首

木葉墮積水西風白雁來祇應破月底曾過黃金臺昔
年弔荆卿臺邊把酒盃落日督亢陂莽蒼秋雲開浩歌
易水寒晚山青雀鬼誰知坐江館兩見飛鴻回空庭日
徙倚慘淡生莓苔援溺先墮井計拙良可哀

昔遊東諸侯秋晚登泰山佇立太平頂超然出塵寰日
觀望吳越浩渺秋雲間長風漾江海天末生微瀾今年
坐舍館江聲滿重關却在幽陵修阻不得看好花靜
有色相對婉且閒無由寫哀怨日遶歌幽蘭

儀真館後園海棠兩花於秋因為小酌賦詩

二年海棠秋幽妍對寥索霜後輒載花枯株吐纖弱化
工為詩人故令造物錯木落出奇芬風度亦不惡尖黃
簇短葉膩翠光欲爍感縮包紅粟殷濃入深萼稀疎生
意怯靜麗尤綽約飛絲冒青蟲螭蛸共聯絡深閨養春
嬌霜華滿珠箔賴得西風輕微薰小陰作盈盈出宮妝
新寒翠綃薄空庭自顏色含恨誰附著息亡楚無言意
婉心不樂琵琶怨昭陽所遇非所託獨有未歸人相看

慰孤酌却似海南時坡仙政漂泊有酒仍有花世事且
高閣後時亦何遲適寓今猶昨香霧霑新橙傾酒兩螯
嚼銀燭更高燒秋花易零落

甲子歲後園秋色四首

雞冠

夷則播新律卉木協秋候綰結流火餘的鑠金天宿
莪列庭除摘摘儼雄秀炎帝朝火官絳幘軒宇宙植立
竟不拜離披擁青袖奕葉初類莧吐心漸如豆脉絡引

絲起一片珊瑚瘦雲芝茁紅腴紫茵卷翠脰碎顆感丹
砂肉綻殷血透怒割赤龍耳勁磔還亂糝麻葉薄且聳
山字缺乃覆查牙欲成角擁腫下連味生全餘小穗展
盡帶殘皺昂藏偃膺高突兀出羣驟還將早霞映欲向
朝日睂月露終夜棲風雨幾回鬪再礪復自止交退誰
與救區區閒草花象物與接構弭兵日觀戰亦是自貽
咎垂簾且相忘高枕卧清晝

牽牛

野花照天星星中花亦盛長夏蔓草深疎籬掩斜徑幽
庭日無事森寂澹相映繚繞絲亂垂點綴葉相並金風
一披拂零露光彩競參差碧玉簪綰插滑欲迸霜絲吐
冰同容色好娟淨堂陰青錦張牆背紫苔瑩時方鵲橋
成佳節當秋孟織女能翦裁天河洗尤稱女以秋為期
郎將花作證風雨開雲屏鸞凰鏘月鏡處處乞巧筵家
家喜相慶五年江館客萬事成墮甑不能致龍節空自
悲虎穿永日塵炎蒸中暑甘卧病對花淚盈目坐起不

覺暝雲漢見雙星回頭看斗柄遙憐小兒女昏嫁俱未
竟中流虞風波相見何日更

葡萄

深院荒草長短蔓裂塼縫葡萄本西果南國誰與種插
蘆為扶持灌溉甚珍重瘦骨紫節舒龍頭青線控蟠蟠
上踈籬萋萋將遠縱遭遇雖後時取實望秋仲摘露添
俎豆庶閒館人供誰知六月旱卉木焦死衆斷秧餘幾
花強勉著土擁竟作纏結枯日遶空悼痛肺渴口重乾

望梅心欲烘，忽憶河隴秋。滿地無歇空，支離半空架。串
草十里洞，拇乳積成岬。頽癭接梁棟，一派瑪瑙漿。傾注
百千甕，往歲見沙陀。回鶻正來貢，詔賜琥珀心。雪盛瓶
盡凍，查牙飲流澌。氣壓黑馬潼，一旦離魏闕。五載猶在
宋，見此復何時。烏道目逆送。

野蓼

富池蓮蒲短，久旱餘淺淤。牆隈積餘埃，玉鳳秋不翫。野
蓼根莖堅，幸得侵沮如。節葉瘦且赤，蘼蕪交翠箸。細蕊

亦鮮潔粉米糝丹素獨宰裒輕穗離披滴清露水花澹
晚色幽窅足真趣忽憶過夢澤千里渺煙樹蘆花與蓼
花露錦蕩雪絮深入芙蓉藪遠映蒹葭渡舉鞭問飛鴻
駐馬嚼佳句乃今四壁中浩渺隔煙霧日斜對幽叢聊
以慰遲暮大似辛苦蟲無復風標鷺來因援沈溺底事
極幽錮屢上剗腸書無地瀝血訴嗟嗟好花草焉用生
此處祇因為詩人故故獨不去嘗膽如啖蔗食蓼猶饒
御仰首但有天志節久愈著

幽思六首

江山鬱幽思，靜止有天光。
宛然褰薄帷，明月照我牀。
蟋蟀鳴孤根，鴻雁頽飛霜。
惄惄動羈衷，耿耿發清狂。
有萬來無端，百折縈回腸。
晤言且伏枕，一寐成兩忘。

鸞鳳翥丹霜，尺鷃捨枯株。
知止各翱翔，卑高一何殊。
精衛苦填海，冤憤一何愚。
鴟鳩不為巢，亦自有所居。
偉哉衡門士，高卧一束書。
曲肱有餘樂，不用長者車。

濯纓厭世塵，入海求夜光。
貝闕涵珠宮，異色森綺芒。
采

采滿懷袖駕龍登扶桑赤鳥驚上天火曜舒乾陽回視
乃瓦礫自媿空犇忙書生莫謾愚弊帚安足藏

有物莫不由萬古長安道區區往來者總向塵中老年
年雨灑清日日風驅埽行人竟無迹涸轍生秋草我欲
謝帝闈離居事幽討束載無良辰幾回問蒼昊

藏舟泰山巔偶值懷襄流忽從歸墟東直向西海頭洗
日復濯月光抱空中樓扶疎散青紅異氣纏九州忽焉
閣寒沙佇立令人愁明朝早潮來欲往不得留

景晏念慮歇支頤坐看山起來復何為結佩紉幽蘭萬
事從悠悠不媿俯仰間舉杯謝塵世月落梅花殘深江
總風波天澹孤鳥閒氣數當閉塞我亦方閉關

劉祁

古意二首

庭前有桂樹綠葉尚離披秋風動地起飄落將安歸高
飛入青雲下飛入汙泥貴賤既偶爾孰為喜與悲

秋江有芙蓉顏色好鮮潔褰裳欲采折水深不可涉巖

風下飛霜芳豔空凋歇悵望一長歎臨川無桂楫

送雷伯威

朔風起天末落木鳴空山
冰霜正凝洵遊子百里還
出郭送將別徘徊上高原
如何睽離情對此芳歲闌
壯士志四方不須涕洟瀾
人生非山海會面亦不難
願子崇明德餘功振文翰
長因東南鴻惠我金玉言

姚樞

聰仲晦古意二十一首愛而和之仍次其韻

十錄

首

聖聖繼天極授受惟一中宣尼集大成玉振條理終盡
性無思勉中道何從容乾坤有全德尚資參贊功

韋編日三絕孳孳何所嗜人道合天心天人本無二盈
虛消息幾進退存亡事何當擬虛元百世老輔嗣

觀人莫觀貌相馬不相肉羣經無釋辭熟讀意自足易
道微九師春秋散公穀古今有成言此論非余獨

高明懸萬象經緯成縱橫君子動靜機一以蹤天行後

來英偉士槩舉名書生胡為事無用篆刻風物情
任重不易勝無為鼎折足小利害成事不達緣欲速閉
戶豈遺世入仕非干祿出處貴適時違時招自辱

夷齊顧名節不食餓首陽尚父應天討奮時清渭傍心
跡異天壤日月同輝光道義有如此人惟重行藏

志士慕功業富貴鴻毛輕仁人懷道義不為功業縈富
貴詎可求功業從自生狂狷奚所取無由見中行

有士氣凌雲孤松挺高節壯懷入酣歌歌長擊壺缺鬢

髮日以秋肝腸老於鐵從知養浩然此意潛消歇
拔茅連其茹激濁揚其清雲山興大厦諒非一木成
疑萬斛舟水積舟乃行羣材惟柱石國勢何用傾
天道有定常推行無少忒人心復何為遷變莫能測
古人貴全交所貴在恒德黃金百煉餘不改當時色

許衡

遊黃華

我生愛林泉俗事常鞅掌十年苦煩劇一念愈傾仰峰

巖看畫圖雲煙入想像久成心上癖欲忍不可強荷有
敬齋公恒以善相長攜我遊黃華一洗塵慮爽行行歎
竒絕舉目皆勝賞鏡臺聳百嶮瀑布落千丈石苔積重
痕溪風動幽響使我躁競息使我心志廣恍如夢中身
翱翔千古上回首聲利場誰能脫塵網我老得仁心動
作皆可像還家擬鄰居求田冀接壤便許樸鈍質於此
靜中養

送竇清淑

初來識君面此行見君心
匡時有長策慮遠憂且深
俗情取近效雅意入幽沈
人生貴所依所依貴知音
知音得長布身將比黃金
我本貧賤士多思委相尋
未得辦一飯胡為遽分襟
征鴻出遠塞西風動疎林
去去渺萬里何年酒同斟
含情望無極白雲障孤岑

別西山二首

大山如蹲龍小山如踞虎
煙嵐鬱蒼翠遠近互吞吐
我來蘇門居遨遊成樂土
策杖望朝雲捲簾看暮雨
佳意

豁塵腥勝槩入談塵使我鬱陶消使我勞瘵愈生平鄙
吝心一洗出千古回首聲名人何殊坐圜圜遠役非素
懷况有跋涉苦吟鞭裊春風遲遲如去魯芳菲二三月
追遊盛梅塢歸來願無違一觴相對舉

我愛林慮山不處要路津茲焉幾千古絕彼朝市塵我
來成素交澹澹日益親形骸兩相忘誰主復誰賓充然
樂我飢怡然棲我神朝光連暮色佳意含餘春心境一
融會世味殊未真奕奕草木光熙熙禽鳥馴衆物欣有

託吾廬行亦新詩書詠而歸况有耆德鄰

王磐

遊黃華山

林慮著太行峰巒一都會晴嵐照郭郭朝日炫金翠盤
盤黃華山高秀衆峰內萬仞青芙蓉屹立見根蒂有泉
不知源滂沛落雲際初疑玉虹垂兼訝銀河潰翻翻雪
練飛洶洶風雷沸前年會一遊披覽恨未細今茲重輕
過適與佳客萃坐分石上苔行並林間轡緬懷雪溪老

遠出遼海外飛聲入中華遂占此山麗吾家墨竈峰卑
小衆所易婆娑百本松龍蛇護清悶煙雨一窗書作我
幽棲地會看此名山永無黃華配江山無大小玩賞因
人貴嗟我復何人題詩聊自戲

崑崙山

昨日遊黃華抵暮方言還今晨到崑崙驅馬五松邊未
移金門日還指元康煙山中富清境不暇相周旋大似
山陰客望門却迴船空懷上方寺矯首浮雲顛瀑布落

晴雪金燈開夜蓮何當重經過巖下細留連

劉因

韓魏公祠

定州古北門作鎮多英奇如何郡學傍獨有韓公碑乾
坤極厚大運物物不知堂堂宋三朝斡旋公似之惟公
元默間泰山已四維天宇公之祠元氣非公誰郡人一
何愚而於公欲私大者且勿論緒餘猶世師千年闕古

堂誰歌鄭國詩

公闕古堂
富公有詩

裴回老柏前目送秋鶴飛悠

悠五色雲悵望今何歸

仙臺

碣石來海際西南奄全燕中有學仙臺燕平欲昇天燕
平骨已朽遺臺猶相傳雖復生青松歲久摧為煙極目
望海波不見三山巔三山巨鰲簪山人蟣蝨然使無不
足論信有亦可憐大塊如洪鑪金石能久堅天地會有
盡何物為神仙空山無笙鶴落日下飢鳶今古非一臺
浩歎秋風前

黃金臺

燕山不改色易水無新聲誰知數尺臺中有萬古情區
區後世人猶愛黃金名黃金亦何物能為賢重輕德輝
照九仞鳳鳥才一鳴伊誰腐鼠棄坐見飢鳶爭周道日
東漸二老皆西行養民以致賢王業自此成黃金與山
平不救兵縱橫落日下荒臺山水有餘清

張燕公讀書堂

陰壁下寒泉陽崖隱深洞想像張幽州當年此絃誦遐

情納方寸灑露驚宵夢既有真積功豈無致時用不然
起絕學猶當垂後統濟濟唐開元儒臣相伯仲文雖數
燕許名不並姚宋遂令百世下煙霞抱餘痛尋幽縱步
貪懷古清歌送緬思白鹿翁眼中見連棟茲山有道氣
會遇或天縱聊以永今朝白雲不可種

龍潭

盤磴脫交蔭平壇得高岑高岑不可攀哀湍激幽音窮
源豈不得爽氣來駸駸靈潤發山骨沮洳下崖陰為問

石上苔妙理誰曾尋乾坤有乾溢此水無古今下有靈
物棲倒影毛髮森東州旱連歲呼龍動雲林顧此百丈
潭豈無三日霖為霖此雖能鞭策由天心日暮碧雲合
空山深復深

經古城

我行常山尾高城下吾前按轡覽形勢依依見全燕易
水開前襟飛狐連右肩遙想豪傑場撫已增慨然薪人
過我傍一笑如相憐指城前問余考古今幾年沈思未

及蒼行歌入蒼煙

孤雲

孤雲生幾時冉冉何所適
豈無崑華高路遠嗟獨力徘徊
天中央明月為顏色下有幽棲士
歲晏倚青壁朝飲澗下泉
暮拂松間石相對澹忘情
倒影寒潭碧

遊天城

逕遠澗隨曲崖深山漸少
居然翠一城四壁立如埽
天設限仙凡雲生失昏曉
平生萬事懶登臨即輕矯
山靈

知信息風煙久傾倒顧瞻困能仰泛應習稱好端居得
蕭寂遠眺礙孤峭乃知方寸間別有萬物表未須凌絕
頂曾次青已了

遊源泉

叢祠鬱蒼翠萬古藏清幽泠然石上足不逐蒼波流長
風索我御欲舉仍遲留白雲何山來相對亦悠悠

玉溪精廬

居然山四顏危檻俯晴春川氣生不極翠潤流衣巾林

陰起薄暮酒色生微醺
歌聲忽落谷驚歸欲飛雲

隱仙谷

山川含太古風氣如未開
中有幽棲人日暮斲蒼苔
吾曾素羲皇人世不可諧
此地復何地恍若登春臺
山局掩對峙石逕迷縈回
桑麻連水竹屋宇依山崖
燕南避世謠千古知我懷
橫渠百世師一區竟相乖
知音得元

老龍門有遺齋

伊川先生上文潞公求龍門菴地書略曰勝善上方舊址荒廢為無用之地欲

得葺幽居其上為避暑著書之所唐王龜勅書堂於西谷松齋之名傳之至今某雖不才亦能為龍門添勝迹

於後代為門下之美事賤子孤旅人念此良悠哉於世豈有望居
山亦無媒舉杯對山靈欲去仍徘徊他年要勝跡此駕
當招來

遊雲水菴

乘春奮幽潛觀化登邱山哀淙聞遠壑息駕思雲關
石密松桂結屋珍茅管生煙紛漠漠激流散潺潺山石
浮壽色澗木榮歡顏覽物有真意撫節驚循環悠然千
載情儼若盤石間眷焉欲晤語古人何當還

泛舟西溪

萬山倒滄浪一葉凌嵯峨嵯峨為飛舞翠影如婆娑輕
陰散雨足淨綠生圓波人間碧海幻老眼青銅磨風雲
幾千古辨此雨一蓑溪南有幽人鼓櫂前山阿煙深渺
無處月色浮松蘿

玉簪

堂陰秋氣集幽花獨清新臨風玉一簪含情待何人含
情不自展未展情更真徘徊明月光泛泛如相親因之

欲有託風鬟渺冰輪

和陶

和飲酒

錄四首

凝冰得火力鬱鬱陽春姿寧減不肯寒陽火如松枝詩
家有醇醪釀此松中竒一飲盡千山枯株彼何為所以
東坡翁偃蹇不可羈

士窮失常業治生誰有道身閒心自勞齒壯髮先老客
從東方來溫言慰枯槁生事仰小園分我瓜菜好指授

種藝方如獲連城寶他年買溪田共住青林表

吾宗幾中表訪我時一致自吾居此菴才得同兩醉逆
數百年間相會能幾次每會不盡歡親情安足貴所歡
在親情杯水亦多味

器飲代窪尊巢居化安宅凡今佚樂恩孰非聖神迹况
彼耕戰徒勤力有千百乞我一身閒坐看山雲白內省
吾何功停觴時自惜

和詠貧士

陶翁本強族田園猶可依我惟一畝宅貯此明月輝翁
復隱於酒世外冥鴻飛我性如延年與衆不同歸孤危
正自念誰復慮寒飢努力歲云暮勿取賢者悲

獨正者
危至方

則礙爾實愀然中言而發違衆速尤迕風先
蹶此淵明規顏延年語也見延年誄公文

四皓二首

智脫暴秦網義動英主顏鬚眉不得見猶思見南山每
當西去鴻目極天際還馬遷歌采薇託名夷齊間孰謂
紫芝曲能形此心間鄙哉山林槁搏也或可班安得六

黃鵠五老相追攀一笑三千古浩蕩觀人寰

留侯在漢庭四老在南山不知高祖意但欲太子安一
讀鴻鵠歌令人心膽寒高飛橫四海北雞生羽翰孺子
誠可教從容濟時艱平生無遺策此舉良可歎出處今
誤我惜哉不早還何必赤松子商洛非人間

吳山夜雪圖

江南無寒歲一雪今幾時吳山豈無春畫此寒巖姿壯
哉萬里流不廢東南馳胸中謾長風俛仰今古非誰能

唱小海為和大江詞

月下獨酌

佳月靜可飲一天明水寒餘光泛不極徘徊尊俎間但
覺涼露下不知清夜闌醉眠吾有興君當下西山

書堂谷晏坐

上負青天壁下引碧澗滋中有晏坐石日夕忘吾歸永
懷幽棲人千載誰與期人間九瀛海莽蒼天相圍黃塵
重如霧舉手不欲揮白雲如可招願作雙鶴飛

九日登洪崖

有道士居此今
二十年不睡矣

卑居不見秋登高自誰始清狂未免俗謹厚亦復爾山
光故相迎百步翠可倚屈指數勝遊茲山居食指高絕
讓龍門平敞亦專美羣山渺波鱗天開見洪水列岳真
情塵遐瞰小千里却恐行路人視予旋磨蟻解衣林表
坐爛摘蒲萄紫甘漿來逡巡毛骨脫泥滓勝境得真賞
泉石迴如洗况有幽棲人嗒然空隱几相對已忘言一
笑雲林喜回首暮煙深高歌望吾子

遊龍宮

翠澗如生煙石瀨欲無雪縱目失平地仰面猶清樾時
節未當春生意方謀泄隨時久閉藏與物今超越茲遊
豈人力勝境殆天設拊石看棲龍髣髴仇池穴聞說如
桃源自古有深絕摳衣徑欲往不見當年轍獨立御長
風哀歌山石裂

九日攜諸生登西山

九日秋服成童冠從我遊萬古清沂春重結西山秋白

雲歸青岑狂瀾落滄洲永嘯長風來爽籟生巖幽清商
失搖落生氣浮林丘門生顧我言樂矣行歸休風袂尚
飄然此意浩難收

重遊北溪分韻得暉字

蒼黃淡野色草樹含清暉林居隱葱蒨晴嵐散霏微歸
雲有真意鳴禽發天機勝處必深會輕觴豈虛揮山泉
來何從北望空依依

劉宣

飛翼亭

朝挹東山雲暮看西山雨孤亭在中央相對如賓主
矯卧龍蟠軒軒飛鳳舞樹影各參差嵐光互吞吐吁嗟
吳越亡於今已千古不悟抉目忠詎知嘗膽苦登臨撫
陳迹淒涼與誰語白鳥煙中來長歌下山去

胡祇適

題思聖堂

汶上魯中都哲人宰茲邑石刻思聖堂後人知仰德汗

池困飛龍鸞鳳棲枳棘天意人豈知來者三歎息立言
澤萬世貧賤何足惜再拜登故臺斂衽拱而立恍如夢
見之受教開茅塞

王惲

拜奠宣聖林墓

庭訓墮渺茫師授悖嚴誠羌予不惑年行已得夷隘今
歲客東魯似為神所介駕言逐秋風得展闕里拜遙遙
魯甸餘汶水走湍瀨憑軾望雲林鬱鬱佳氣靉齊莊趨

兩楹奠獻成孤酌歸然三聖封仰止高泰岱恨生千年
後今夕備埽灑披雲覩天日太極開一畫彼蒼詎能言
諄諄聖為代三綱與九法範圍無內外君臣以之定乾
坤以之泰東周不可為述作萬世賴藐聆徇鐸音元化
雷雨解敬想燕居容金聲鏘玉佩當時七十子授受儼
如待鳳兮鳴幾時諸子沸秋籟一朱亂紅紫百穀茂稊
稗愚者甘下達誕者樂語怪韞藏寶康瓠幹棄清廟鼎
明倫得不泯而有六經在天高孰可階一氣包厚載茲

遊固難言嘿契心有會宵中九雲夢吞納失蒂芥循循
善誘辭師也書諸帶緬懷伯禽業郁郁文獻最三桓張
公室霸功熾而汰一奢去無復荒陵餘石解煌煌天乙
孫膚敏半冠蓋德博慶自修道大世能邁金石貫元精
泗波來遠派汪濊一聖海不隨梁木壞歸侍金絲堂攝
齊聞謦欬恍如到帝所鈞天廣樂備洗我兩耳聽肉味
忘一嘬詠歸寫遺音風雅變鄙邛一簞老東家吾知其
樂大遲遲不忍去寒日下蒼檜

鹿喻

我本麋鹿性出處安自然金鑣非所慕志在長林煙得
遠機穽地食革飲清泉呦鳴錫同類甘以辭華軒野兕
出其側暗蹂山前田農家伺所害乃知獸之愆彼兕以
計去嘉禾歲芊芊野人居山中數畝事墾斲慮為町疇
場指鹿乃兕屬雖無搨刃心見之惡且逐鹿心素無機
淡與標枝閒遁跡入幽谷擇音遠人寰尚為山中人置
疑齒頰間

遊萬固寺

中條鬱蒼蒼首尾固雄大連山一卧虎矯首盡兩戒東
南萬峪門犖确入幽阨空青上絕壁截葉兩崖對南山
開畫幘高下蔚萬檜扶藜到山門黃衣六七輩寺殘薄
水賞一水良可愛尋源入雲蘿不惜阮屐敗掬飲清臆
塵坐睨巨石怪山空響佩環林迴騰怒獬行聽溪聲回
周覽詢勝槩當年爽心亭萬竹爭映帶碧鮮照清泚襟
袂濯沆瀣人境兩渺茫佳句儘誇邁

舊有石刻坡詩云
水自竹根流出風

從松頂飄來座上儘為佳士更無一點塵埃

開軒邀客飯放目欣一快盤餐

固踈糲泉冽幾肉噉俄焉林風振萬壑一氣噫前林疑

虎嘯作勇助吾僊筆落還自驚一掃衆峰靄

寺僧請書殿閣名故

云山僧喜醉顛海會得珠貝興來本無心遊藏詫佛界

夕陽送歸鞍依約虎谿外風煙作破墨塔廟失所在鍾

美厭摹寫悶伏化機藹盤空乏硬語技癢苦無賴馬首

詩遽成一笑豁吾隘

汾水道中

蒼巔互出縮峪勢曲走蛇回眺驚後擁迎看復橫遮雲
林蕩高秋半嶺翻晴霞十里九渡水清流帶寒沙山溪
本幽寂激之聲乃譁解鞍憩美蔭覺我心靜嘉風枝滿
秋實野菊被水涯幽馨散蘭馥紅鮮綴丹砂二物固瑣
碎託興騷人誇我欣記所見信筆書田家

過鹿臺山

在澤州沁水縣南二十里
時被安西王命伐石於此

遠尋文石崗來歷南山纏鹿臺臺為山幽徑蟠古篆後
峪行未盡前嶺已當面秋聲蕩林樾風露淒以泣陰壑

氣翁鬱疑有虎豹變山田苦無多溝崦耕已徧柴椶結
半空羅絡碧巖轉自憐終歲勤獸患防一旦我本山中
人束帶對郵掾頓然還舊觀瀟灑償夙願行經雙蟾嶺
石怪驚變現闖首榭樹間氣自太古練月中誰推墜囚
鎖屬山縣乃知北平守認虎飲羽箭物肖本偶然長歌
下層巘

苦熱歎四十六韻

效昌
黎體

祝融駕火虬頓轡周八裔戰酣西北乾回薄餘暮熾朱

光沸虞淵大地蒸一氣蒼茫夜色溼
幽鬱元象醉今年
六月中荼毒逾往歲金晶才始伏
燂怒勢此銳炎官張
火傘屏翳揚赤幟四合歎陳來一鼓赫離治天潢影半
涸星鳥芒欲彗吟風樹葉噤塌翮林鳥墜併兼坎兌權
不使天地閉王城十萬家薰灼迫一勢乾坤墮熾甕逸
德駭天吏掩關人事絕藏伏敢口議褰裳起中夜通夕
不容寐捫背赭汗流窺井湯泉沸松間有困鶴無夢到
清喉牆根有腐草螢化光哲哲穿簾入我室照眼驚火

齊陰蟾遁老魄火鼠騁黠智夜深過我前跳躑翻飲器
屋古又足蝎伺螫尤謹避簞紋燎炎輝側脅能少憩舉
動體煥熟歔歔氣短細抱水眠或可揮翳何所濟二年
客京師身幸置散地雖無束帶勞唯老覺加倍彷徨不
知曙種髮沐而被四序本平分偏盛誰所致火攻出下
策不已燔萬類嗟此一世人喝死將何厲此生匪金石
流鑠吁可畏內熱復自焚衰槁將立至燥惟以靜勝事
須以義制冰山詎可依煬竈非所媚遐想崑陵巔庭觀

何偉麗巍然五千仞日月光隱蔽回環十二樓空明淡
無際水晶作柱礎羣玉絢軒陛天風掠枕席月露溼環
帔瑤臺擁灑靈萬舞發清吹真仙事朝元鸞鳳互驂翳
閨風接元圃追陪憶遊戲何年墮塵緣坐想無由詣安
得萬里風振此垂天翅脫落區中囚高舉尋吾契

出香竒石

張生貯竒石攜來有遐觀一峰華不注墮我几案間穿
穴作怪供突兀橫蒼顏炷香煙滿竇野燒生春山我久

汨俗冗對之心暫閒瞑坐清興遠夢與孤雲還

雙廟懷古

鐵舉動地來獵火燼九縣睢陽東南衝江淮國所援蔽
遮不使前恢復可立見仁公明此機死守誓不變雖危
所保大如蝮螫解腕最難結衆心存歿匪石轉彼蒼界
全節誰為落賊便已矣君不忘握爪掌為穿竟能濟中
興淮海了清奠至今忠烈氣皎皎白日貫賀蘭觀成敗
不飲浮屠箭殺亡計多寡此論誠可辨我來拜遺像凜

對如生面乞靈激懦衷
剗決剛同鍊朔風吹樹
聲尚想登陴戰暮倚
暈月城悲歌淚如霰

江船二詠

篷

尺箐編黃蘆節密數須
隻長短隨所宜張弛易
為摘長者

二十九節
廣二丈餘一傍繫脚索
若網網總緝北人布為
帆南俗

篷以荻舟師貪重載高
挂借風力順流與溯波
巨鷁添羽翮望從遠浦
來一片雲影黑亂衝渚
煙開重帶江雨

溼百里不終朝用舍從順適夕陽見晚泊堆疊紛襞積
水雖物善利其助乃爾益

櫓

江船一鉅魚櫓施乃尾鬣當其淵水深棹弱不救乏故
令施航後前與棹力合濟川具有五此物乃其甲一聲
天際來欸乃中流發或浮大河東並岼行若狎終朝卧
舷間蘭橈但空插緬懷剡木皇智創萬古法

覓風字欵硯詩贈侍其府尹

硯本發墨具不爾安用他碧紫暈鸚眼黝黑深宮鴉彼
端類高人風姿同云佳遠韻不少各清談浩無涯但於
當機時未免思棼挐若或砥礪用茫然手空義硬則墨
為褪軟則磨泥沙惟歛士之傑體性何交加羅紋與刷
絲一寸皆可嘉回視端溪公有名實則老新安山水窟
澤大生龍蛇舉世被其利何有蛭與鼃山高溪水清其
芒例如硯嘗聞右軍硯風字琢手奢是名為水箕朶頤
駭哈呀松煤燼無餘惟恐中書了池寬水瀾漫挹彼如

尊法陂陀浸半海揮灑生雲霞平生未嘗有夢寐江之
涯君今去為邦過此空成嗟包公尹端州歸不一硯拏
珮肝類安邑一笑春生華書生乞索態殆是心貪邪禰
衡溺所愛竟摻漁陽過今冬與來春會有泛斗槎雄雩
或雌縵分送張華家

王旭

遊山林寺

石徑俯雲壑竹林開幽境寺古僧徒稀山深嵐氣冷待

遊未終興紅日忽倒影曳杖披暝煙長歌下前嶺

宋渤

璜溪書院

公餘兩方歇策馬城北郭柳侯讀書處魚鳥尚欣躍鑿
池引泉流種樹滿山脚窮堂峙碧阜風露棲軒箔湘南
富竒峰湘山互經絡斯文自元氣萬古猶如昨相從二
三子暫解塵纓縛廓我仁智心飽此山水樂

丙戌冬至衡陽食柑

衡陽冬猶溫長至似春日朝盤富筍蔬夜砌響蟋蟀白
酒如玉膏黃柑飽霜實更闌袂衣坐燈火不欲即三年
江之南光景去如失匆匆節序時無歲寧家室宗祏香
火寒牢醴誰致潔三雛隔兩地不得遂顧恤勞生分有
數敢但念安逸不虞與求全世或不可必官事未易了
應止筋力率漳東二頃田亦粗給杭秫

衡陽村院得杖材寄徐容齋

放舟清湘波繫舟湘水曲落日紅露生蔽映兩崖綠衲

衣何處僧揖客看脩竹攀緣入幽深松桂薦芬馥輕颺
振裳衣餘韻久回復亭亭小梅花却立野人屋蕭然方
出林碧玉萬竿矗敢攀籜龍新請乞老枝感詩翁澹古
思與汝交不瀆往登讀書堂清修配佳菊

程鉅夫

至洪王肯堂治書見示芙蓉詩次韻

春風歇桃李秋雨深莓苔蕭然公館間得此奇種栽九
天清露零一道紅雲開句牽綠衣隊酣宴瑤池杯穠妝

月鑑懸麗服霜刀裁瑞蓮湧平地妙色分五臺
暫陪飛仙遊偏稱幽人懷終疑閨苑去嘉會
何時諧此日眼雙明臨風首低回長當歌楚
騷招得花神來

家園見梅有懷疇昔同僚諸君子因成廿六韻
奉寄徐容齋王肯堂諸公

往時姑射仙夜墮江南村江南富嘉植梅花衆中尊
九地悶元凝先天占春暄的皪冰雪姿不受風塵昏
孤清愜幽意騰馥醒吟魂愛之玩不斲冥契終無言
羅浮本

幻境前夢覺已諼蹇蹄滯京華倦翼棲淮垣後先青雲
士表裏白玉溫我形自覺穢交道久愈敦貞節保松栢
芳心共蘭蓀信知歲寒友何異連枝昆獨賢天所矜家
山問雞豚歸來適仲冬平旦窺荒園依依故人面竟日
對傾罇清池踈葢影淡月新梢痕冷然絕埃壒恍若遊
崑崙忽憶如花人高談霏露繁眼中不可見思羶風翩
翻頗慚標致似遠近殊託根洪鈞轉巖令青皇畀新恩
坐看佳實長適口塞衆喧徧遺實中仁生意彌乾坤平

生識賞心皎潔明朝暎凌寒折一枝殷勤寄王孫又恐
遠莫致作詩當重論

次韻肯堂學士冬日紅梨花

黃菊卧階雨六花舞天風壁凍室生白手僵肉作紅秀
句忽墮前光怪侵簾櫳至人宴坐處元氣含冲融無情
及枯株嫣然為修容坐令玉華君來從蕊珠宮麗妝凝
祥雲明眸轉驚鴻豈非散花手試君情所鍾老我嗜好
淡空詩亦雷同祇願酌花時毋忘比鄰翁

次韻盧疎齋就以贈別二首

百川晝夜流萬折不能止羣山勢崩奔終古乃在此人
生費推輓三歎中夜起瀟湘有佳人朗月鑑秋水思之
不可見曠若隔千祀相逢在歲晏使我寢食美又言當
遠別東去數千里何由小躊躇招招彼舟子

芥拾琥珀針不言自相得留君我無辭送君我無力願
君加餐飯努力崇明德江空餘深寒出入慎扶翼梅花
照清潁夢寐耿玉色矯首東南雲金門幸回憶

和陶詩

秋風吹庭樹密葉潛銷落元燕寧久翔白雁紛南泊清
晨得尊酒冥然還獨酌年運倏徂謝春秋焉能託依依
仰先哲緬邈空述作江漢日東流寒花繞叢薄開卷撫
休運振衣望邱壑

秋江釣月

荷蓑非避世持竿不求賞夙抱江海心寧為利名鞅天
明紫煙裏日暮清波上四顧無人知孤舟自來往

瓜爾佳之奇

題周孝侯廟

長橋漲晴波南山滴空翠清風孝侯祠六月薄炎熾蒼
然擁喬木廊宇深以邃升堂拜遺像凜凜增壯氣緬懷
絕塵姿跣弛幾自棄一念狂聖分千秋仰高義義興阻
湖山從古勞撫治况當離亂後生理多不遂連州虎為
害接浦蛟作祟故國神所遊陰相得無意我來按茲郡
強禦寧汝畏恐被蛟虎徒匿形知暫避不埋張網輪徒

攬范滂轡澄清悵何時留詩志子媿

苟宗道

題申伯福遊山圖

聖賢初用心出處固不苟胡為慕萬鍾胡為棄升斗鵬
鷗兩逍遙夷惠各有取丈夫遇明時立志期不朽中有
幸不幸竊位徒可醜申君閱閱子繪作山林叟推却簿
書叢便與麋鹿友不醉河陽花擬種彭澤柳堂堂胡紫
山毅然為倡首於今宰杞城欲去尚掣肘未得遂吾初

慎勿廢官守安知遊山人不是調元手

元淮

水竹軒乃予退居之所政與熙春樵嵐相鄰朝
暮之間雲煙變態四時之景氣象萬千其畫工
吟筆之所不能盡者皆致吾書窗几席之間因
賦樵嵐間居水竹軒土字韻邀好事者和之

錄二首

水鏡得閒居脩竹映軒廡樵嵐城市外迴有山林趣幽

窗宜習靜孤坐忘百慮風枝正韻秋寒葉更飛雨茲來
息奔走即此成燕處道勝物自輕權勢皆糞土

容膝坐小軒野興厭廊廡潺潺水竹幽寓此得佳趣憂
道輕黃金身外何足慮水鏡瑩無塵竹圃自煙雨幽棲
雖寡徒筆硯可同處更喜芋區旁尚有種瓜土

方回

秋晚雜書

昔聞有烈士哀歌缺唾壺衰暮心不已狗名殆忘軀我

老詎復爾一壺不願餘外物百無嗜惟喜讀我書空樽
已絕瀝寒庖僅微蔬兒啼得非餒塵編聊自娛敝廬匪
無山猶茲寄城隅車馬不至處願言遷林居

賦詩學淵明詩故未易及飲酒慕淵明酒復罕所得荒
涼數畝園卜築未成宅此或類陶家秋菊亦可摘古稱
士希賢將無肖厥德如我於柴桑往往似其迹儲粟既
以瓶子尤不勝責有時醉欲吟至集索逋客

堂堂陳去非中興以詩鳴呂曾兩從橐殘月配長庚尤

蕭范陸楊復振乾溥聲爾後頓寂寥草蟲何薨薨永嘉
有四靈詞工格乃平上饒有二泉旨淡骨獨清學子孰
取舍吾非私重輕極元雖有集豈得如淵明

吾家一何竒奇峰照南窗是為紫陽山萬木青縱縱上
有出岫雲下有見底江江清雲無心伴此眉宇龐詩思
忽飛來時有白鳥雙落日澹秋水寒溝度枯杠歸歟書
屋夜昏燈剔幽缸懷人良未遠遯翁生是邦

秀亭秋懷

一室局戶牖古籍勤討刪鬱鬱忽不樂扶杖登東山莽
蒼何所極秋色天地間我欲出塵世黃鵠無由攀憂端
從空來崑砢未易宣意闊步武窄四顧盡險艱不如復
我所陶此靈府閒

老懷幸無事何用知秋風團團烏柏樹一葉垂殷紅為
此有所感長吟鼓虛空城市了在目心隔雲萬重燕席
鼓吹急游騎呵殿雄亦各適爾適擾擾塵堞中焉知天
地外有此頽然翁

八月十五日二十日兩至南山飲瀟灑亭

悠悠桐江水寓廬十二年重來六日內兩日登南山南
山有何好高閣西北偏隔江三千家一抹煙靄間閣檻
一巨松挺出衆木前野性所酷愛老藤相糾纏亦如我
與僧相對談幽禪稍遂物外性屢寫酣中篇故侯復齊
民鬢髮成華顛念當舍此去焉得長周旋

初三日水長二丈早行

夜聞舟人呼江水溢二丈岼薪隨波流救者何擾攘亥

子十月交地氣不當上十日柱礎汗蠅蚊闕帷幌此時
肯為雪豈不兆豐穰積熱化滂沱傾空瀉盆盎前夕適
醉卧不省船背響濤聲撼醒枕於茲發孤想炎方節侯
乖病叟體膚癢遑遑欲何之曷日中園仰星斗猶粲然
曉征發雙槳起視所泊處餘燈煜莽蒼

送劉都事五十韻

晦叔
密齋

近人於仕宦如以韓盧獵泰山有不見得獸誇足捷學
問夫何如有書鑰諸篋府史以為師僅能署吏牒雕鞍

驟肥馬畫閣貯美妾萬一至公相豈堪任調燮老友劉
密翁早隸周孔業大輅鸞和鳴大樂律呂協南省據都
曹不以貴自挾朋來多下交賓至必謙接解官寓城東
座寒乏氈氈高卧懶問遺兩落秋蕘英積薪後居上彼
勇哂吾怯為言恥益晉如病夏畦脅有時酤我飲荒墅
縱步屨果核飭俎豆羹糝供匕筴居然道懷孚宜爾情
話接公才豈不知大川宜作楫顧於名利波未肯卜利
涉人生惑外物種種意欲愜高睨官爵梯等級恨不躡

愚竊窺此翁嗜欲弃已欲寧為三省魯不慕一諾俠經
史入胷中丘陵堆重疊文詞落筆下布泉極熨帖莊重
異新銳詳緩後虛謦誰歟心怏怏或者言喋喋氣帥直
其內義理為管攝歸歟埽松楸試負都門笈中書多缺
負聞早下堂帖不然肅政臺冠豸羣小懾分司江之南
亦足煦疲劣去當柳嘶蜚還及杏飛蝶鯁生嶺海夢尚
憶鳶跼跼短隨李廣衣長彈馮驩缺萬死脫一生麤免
翳桑輒今年七十老鬢禿無可鑷與人素寡合况又畏

訟謀往往交游間平地生巖業萬里風枝殊一旦合鷓
鴒揮塵許諳聽曳履容追躡公將北闕覲我終南畝
甚欲餞遠郊扶杖尾蹠躩愧無一杯酒陽關唱紅頰他
人侈別筵推牛宰剛鬣而此何朽然窮極碁無劫顧視
童子佩斲礪若觴鰈持干富人肆詎肯出質貼吟茲送
行篇終夜不交睫浩浩號西風索索雨木葉

御選元詩卷十二

謹案第四十二頁後五行荒塹縱步屨刊本塹訛
野據方回桐江集改





總校官庶吉士臣侍朝

校對官檢討臣蕭九成

謄錄監生臣周元